




Segun Ing. Richard Mercera

# GOBIERNO LO TIN ALREDEDOR DI 283 MIL FLORIN DI GASTO CU CARNAVAL

## ORANJESTAD (APA)

Gobierno lo tin alrededor di 283 mil florin na gasto cu carnaval di e aña aki, segun Ing. Richard Mercera, director interino di DOW. E 4 florin cu lo paga na stampia riba peticion lo no cubri esaki.

DOW e aña aki lo pone 3 toilet publico, lo marca tur e percelanan y lo traha mas baricada pa sera e ruta di Vondellaan y L.G. Smith Blvd.

Ing. Richard Mercera a

splica cu mas o menos un 300 percela lo ser reparti y actualmente DOW ta bezig ta marca e fronteranan di e percelanan cu penchinan y numera cu lo ser marca riba e asfalt.

DOW a tene cuenta cu esnan cu no tin trailer. Pesey gobierno a destina 3 sitio unda cu lo tin afdak pa solo. Sinembargo e aña aki e prome fase solamente lo por ser realiza. E prome fase ta e pida den Vondellaan conoci

como Cricket Field unda lo bini 45 tipo di tent di 3.50 pa 2.50 di grandi cu ta cubri 150 meter. E tentnan aki lo por ser usa pa publico den e sentido di first come.

Algo nobo e aña aki tambe ta cu gobierno a laga traha tres toilet publico cu lo tin awa y corriente y lo ser conecta riba riool. Nan lo ser poni unda banda di e Cricket Field, uno den L.G. Smith schuin di Talk of the Town y e di tres pariba di Lagoen banda di laman.

Mercera a remarca cu aña pasa Vondellaan a ser sera cu baricada y a resulta di tabata masha bon mes pa tanto e participantenan como esnan para banda di caminda. DOW ta trahando mas baricada pa e aña aki sera asina un gran parti di e ruta, sigur L.G. Smith y Vondellaan.

Hopi ta esnan cu sigur lo bai critica e forma di proceder di gobierno pa loke ta ponemento di trailer, ya cu cada peticion cu bai den

tombola ta costa 4 florin. Pero realidad ta cu gobierno tin masha hopi gasto mes y cu e 4 florin di stampia lo no cubri esaki totalmente.

Si tene na cuenta cuanto lo mester bai paga e empleadonan di DOW, Polis, Serlimar etc. na overtime, cuanto ta costa e baricadanan, e toiletnan cu lo ser traha, e tentnan, marca e percelanan etc., esaki lo bai costa alrededor di 283 mil florin.